

III.

EXHORTATIO AD PROCERES REGNI.

- At uos Romani fidei munimine fulti
 Conseruate fidem subsidiis stabilem.
 At uos nunc Itali coniunctis uiribus aucti
 Deuitate hostes mobilitate leues.
- 5 Subdite Nortmanni iam colla ferocia regi,
 Imperio adsocii bella parate duci.
 Hinc Sarracenos deuincite, tum simul Hunos,
 Reddite securam gentibus Hesperiam.
 Si puer est rector, deus est altissimus auctor,
- 10 Heinrici genito sistite iure sacro.
 Vicistis mundum, si seruaueritis aequum,
 Et cum iusticia subdita erit Libia.
 Grecia iuncta aderit, nec erunt orientia bella,
 Et cum muneribus curret Arabs timidus.
- 15 Subdita erit uobis reuerenter Hiberia fortis,
 Romanas leges Cantaber excipiet.
 Querite nunc Calabros, pelleo zemate Parthos,
 Quascumque et gentes pars Orientis habet.
 Memphis cum Tyriis uenerabitur arma Quiritis,
- 20 Tellus Aethiopum, gens simul atque Frigum.
 Gallus erit famulus, subiectus necne Britannus,
 Francus in auxiliis pronior obsequiis.
 Sic fiet mundus sub Petri clauibus aequus,
 Et uirtus fidei supprimet arma doli.
- 25 Legibus antiquis totus reparabitur orbis,
 Iulius et Caesar, Karolus his quoque par
 Regnabunt pariles secum ditione potentes,
 Utetur sceptro magnus honorifico.
 Par est militia geminis cum uiribus aequa,
- 30 Par uirtutis opus militię gradibus.
 Militia una tribus, sotius cum laude triumphus
 Tertius est supra religione sacra.

IV.

Guido qui facies totius eras probitatis,
 Hostili fossus improbitate ruis.

V. 6. über 'adsocii' setzt 2 'adsciti'. 14. hier schliesst f. 24 v und durch 'require retro' wird auf fol. 24 r verwiesen, wo in der Mitte von col. 2 der Schluss folgt. 26. zu 'Caesar' setzt 2 'id est Octavianus'. 27. 'dicionē' verbessert in 'ditione' Hds. 29. zu 'militia' fügt 2 'in'. 30. 'miličię' verbessert in 'militię' Hds. 32. zu 'Tertius' setzt 2 'id est Karolus rex catholicus'.